

ասնութիւնը, մարդուս ներքին ինքնայադրահարման քատերախաղը (Drama) առաւել տեսանելի է հեռուստատեսիլ պատանի վրայ, կամային նշաններով, որոնք ենթագիտակցական են, ոչ ցուցադրական եւ դրանով էլ քատերակնօրէն հետաքրքիր, ոչ պակաս արտիստի քեմական նշաններից»²: Ֆիզիկական արգելքի առջեւ կանգնած մարգիկի ներքին «գրաման» (միեւնոյն է, բացայայտ՝ արտաքնապէս տեսանելի, թէ՞ քօղարկուած) եւ «արտիստի բեմական վիճակի նշանները» կարող ենք համեմատել՝ որպէս հոգեբանական գործողութեան արտայայտման ձեւեր, բայց այլ է կրկէսային խաղահարապարակում: Այստեղ արտիստը ոչ թէ ջանում է յաղթահարել այդ գրամատիկական վիճակը, այլ բացայայտ հեղնօրէն է վերաբերում դրան, քանի որ Ֆիզիկական արգելք յաղթահարելը նրա համար ոչ թէ նպատակ է, ինչպէս սպորտում մարգիկի համար, այլ գեղարուեստական արտայայտութեան միջոց է, այն «շինանիւթը», որն օգտագործւում է կրկէսային ներկայացում կառուցելիս: Ինչպէս բանաստեղծութեան մէջ խօսքը գեղարուեստական իմաստ է ձեռք բերում, երբ «յաղթահարւում է» նրա սովորական, աւօրեական նշանակութիւնը եւ բացայայտւում է վերացական (Transcendental) էութիւնը³, այնպէս էլ կրկէսում, հեղնօրէն յաղթահարելով արգելքները, արտիստը մի նոր, ասել է թէ՛ արտասովոր արտայայտութիւն է հաղորդում իր ֆիզիկական գործողութեանը, որն էլ հէնց կրկէսային խաղի գեղարուեստական առանձնայատկութիւնն է, նրա ուրոյնութիւնը: Դրանով կրկէսային խաղը սկզբունքօրէն տարբերւում է նաեւ թատերական արուեստին յատուկ կերպաւորուած խաղից:

Կրկէսն իրականութեան ճիշտ հակապատկերն է, բայց նաեւ նրա շարունակութիւնը՝ որպէս աւարկայական իրողութիւն: Այստեղ բացառւում է ամէն մի պայմանականութիւն, ամէն մի ենթադրեալ վիճակ կամ երեւոյթ, որ կարող է գիտակցուել երեւակայականի սահմաններում՝ իբրեւ թէ այդպիսին: Սա այն արմատական առանձնայատկութիւնն է, որով կրկէսը տարբերւում է թատրոնից: Արտիստն այստեղ կանգնած է իրականի ու անիրականի սահմանագծում եւ իր կենտրոնազանց վարքագծով կամ զարմանալի է, կամ էլ ծիծաղելի: Սակայն նրա այդ խաղը գեղագիտական ազդեցութիւն առաջացնելու համար պէտք է կա-

² ՅՈՎՀԱՆՆԻՍԵԱՆ Է., Դերասանի արուեստի քննարկ, էջ 115-116:

³ Տե՛ս С. ЛИХАЧЕВ, Поэтика древнерусской литературы, М., 1979, с. 113.

ուուցուի այնպէս, որ կարեւորուի ոչ թէ ինքնին արարքը, իրրեւ արտասովոր գործողութիւն, այլ դրա ներհայեցողական ըմբռնումը՝ իրրեւ վերիմաստային արտայայտութիւն: Ասել է թէ՛ կրկէսային արուեստը դեռեւս կենտրոնագանց հնարանքները չեն: Որպէսզի դրանք գեղարուեստական ձեւ ստանան, պէտք է յաղթահարուի ֆիզիկական գործողութեան առերևոյթ քովանդակութիւնը, որն իր հերթին լինում է երկու կարգի՝ կամ պատկերային՝ պատմողական, երբ գործողութիւնը կաուուցում է դիպաշարային հէնքի վրայ, կամ էլ ոչ պատկերային, այսպէս ասած՝ զարդանկարային, երբ այն հիմնականում ներկայացնում է պլաստիկայի, ուժի եւ ճարտարութեան վարժութիւններ: Հէնց այդ ֆիզիկական գործողութիւնը գեղարուեստորէն յաղթահարելու նպատակով էլ կրկէսում յաճախ դիմում են մնջախաղի օգնութեանը:

Այս հանգամանքը նախ պայմանաւորուած է պանտոմիմոս (pantomimos) կոչուած խաղատեսակի առանձնայատկութեամբ, որի անուանումն իսկ նշանակում է ամէն ինչ նմանողութեամբ վերարտադրելու արուեստ: Այսինքն, գործողութեան յորինուածքը՝ իրրեւ գեղարուեստական արտայայտութիւն, այստեղ սահմանափակ չէ իր հնարաւորութիւնների մէջ, իսկ դա, ինչպէս ստորեւ կը տեսնենք, ձեւարանօրէն ուղղակի առնչուում է կրկէսային արուեստին: Ժամանակակից հայերէնում սրան ասում են մնջախաղ, որը սակայն յունարէն եզրի բառացի թարգմանութիւնը չէ, այլ ենթադրում է սոսկ խաղի եղանակը, ինչպէս այդ նշել է դեռեւս Ներսէս Ծնորհալին.

Մերկ արապիկ մի ես տեսայ,
 էր խանութպան ու ջամբռայ,
 Զրուցեց մընջնակ որ հասկացայ,
 Շընիթն անեղ ու մախարայ⁴:

Սակայն պանտոմիմոս բառն աւելի ընդգրկուն իմաստ ունի՝ ենթադրելով ոչ միայն խաղակերպը, այլեւ առարկան: «Ամէն ինչ» հասկացութիւնն ինքըստինքեան թելադրում է, որ այստեղ արտիստի համար «նմանողութեամբ վերարտադրելու» առարկայ կարող է ծառայել իւրաքանչիւր երեւոյթ՝ շնչաւոր թէ անշունչ, նիւթական թէ վերացական: Այս հանգամանքն առանձնա-

⁴ ՆԵՐՍԷՍ ԾՆՈՐՀԱԼԻ, Բանկ չափաւ, Վենետիկ, 1928, էջ 627-628:

պէս կարեւորում է, երբ փորձում ենք բացայայտել մնջախաղի տեղն ու նշանակութիւնը կրկէսային արուեստի համակարգում:

Ներկայումս սովորաբար այն դիտում են թատերական տեսակների (Genre) շարքում եւ առաջին հայեացքից էլ, կարծես, այդպիսի մօտեցումն տրամաբանական է: Չէ՞ որ յատկապէս նորագոյն ժամանակներում մնջախաղով տարուել են թատրոնի նորարար բեմադիրներից շատերը (Jacques Copeau, Всеволод Мейерхольд, Александр Таиров): Սկայն, կրկէսի պատմութեան մէջ նրա դերն առաւել էական է: Հնագոյն ժանանակներից մինչեւ օրս մնջախաղն այստեղ առաջնակարգ տեղ է զբաղեցրել, եւ այդ արուեստի տարրերն առատօրէն օգտագործել են գրեթէ բոլոր կրկէսային խաղերում՝ ձիազարթութիւնից մինչեւ լարախաղութիւնը, կենդանավարժութիւնն ու ծաղրախաղը:

Ուշագրաւ է, որ հայ մատենագրութեան մէջ նոյնպէս չենք հանդիպում պանտոմիմնային համարժէք բառ, սակայն այդ հասկացութեանը յարակից մի շարք եզրեր՝ ցուցք, կատակ, կախալ եւ այլն, ժամանակին հէնց այս կարգի խաղեր էլ ենթադրել են: Ահաւասիկ, ընթերցենք մի ուշագրաւ հատուած Մովսէս Խորենացու «Հայոց պատմութիւն» երկից, որին անդրադառնում են հայ միջնադարեան թատրոնի պատմութեանը նուիրուած գրեթէ բոլոր աշխատութիւններում՝ «Եւ եղև յաւուր միում յընթրիս Բակրոյ մահապետին Սիւնեաց, - գրում է պատմիչը, - եւ յուրախանալն գինուով՝ տեսեալ Տրդատայ զկին մի, զի յոյժ գեղեցիկ էր եւ երգէր ձեռամբ, որում անուցն էր նագինիկ, տրքփացաւ եւ ասէ ցԲակուր. Տուր ինձ զվարձակս գայս. եւ մաւ. Ոչ տամ, զի հարն իմ է: Իսկ Տրդատայ բուռն հարեալ ի կինն, յիւրն Բարշեաց ի բազմականն...»⁵: Մեր առջեւ տիպիկ միջնադարեան խորախճանքի տեսարան է, երբ ազնուականութեան ներկայացուցիչները, բազմոցներին թիկնած, զուարճանում են զուսանների ու վարձակների խաղով: Պալատական ներկայացումների այս տեսակը, ի հարկէ, շատ աւելի հին աւանդոյթ ունի. սկիզբ է առնում դեռեւս է դարում մ. թ. ա., թեւակոխում է հելլենական դարաշրջանը, ապա եւ հռոմէական կայսրութեան օ-

⁵ Տէ՛ս ՅՈՎՀԱՆՆԻՍԵԱՆ Է., Թատրոնը միջնադարեան Հայաստանում, Եր՛ւ-
կան, ՀՍՍՀ ԳԱ հրատ., 1978, էջ 218:

⁶ ՄՈՎՍԻՍԻ ԽՈՐԵՆԱՅԻՆՈՅ Պատմութիւն Հայոց, աշխ. Մ. Արեղեանի եւ Ա. Յարութիւնեանի, Տփղիս, 1913, II, 49, էջ 195-196 (այս եւ յետագայ ընդգը-
ծումները մերն են - Գ. Օ.):

րօք, պարարտ հող գտնելով Մերձաւոր Արեւելքի եւ առաջաւորասիական գրեթէ բոլոր ժողովուրդների կենցաղավարութեան մէջ, հասնում է մինչեւ դասական միջնադար⁷: Պատահական չէ, որ նմանատիպ մի հանդիսութեան մասին յիշատակոււմ է նաեւ աւետարանական պատումներում:

«Եւ իբրեւ եղեն ծնունդք Հերովդի, - կարգում ենք Մատթէոսի աւետարանում, - կա՛մաւեաց դուստրն Հերովդիայ ի մէջ րագմականին. եւ հա՛նոյ թուեցաւ Հերովդի» (Մատթ. ԺԴ, 6): Մարկոս աւետարանիչը նոյնպէս վկայում է. «Իբրեւ օր մի լինէր պարապոյ, յորժամ ընթրիս տայր Հերովդէս՝ յաւուր ծննդոց իւրոց, նախարարաց իւրոց եւ հազարապետաց եւ մեծամեծաց Գալիլեացոց. եւ ի մտանել դստեր Հերովդիայ եւ ի կա՛մաւել, հա՛նոյ եղև Հերովդի եւ րագմականացն...» (Մարկ. 2, 21-22):

Նկատենք, որ հին հրեաների մէջ ընդունուած չէր ծնընդեան տօր նշել: Այս գէպքում, ինչպէս եւ ընդհանրապէս իր նիստուկացով, Հերովդէսն ընդօրինակում է հռոմէացի պատրիկներին⁸, որոնք սովորաբար նման խնջոյքների ժամանակ զուարճացել են՝ զանազան արտառոց ու շուայտաբարոյ խաղեր դիտելով: Ահա, թէ ինչ է այդ առթիւ գրում Յովհան Ոսկերեբանը. «Եւ դու միտ դիր սատանայական խննոյիցն: Նախ՝ զի դեռ յարբեցութեան եւ ի զեղիութեան էին, յորժամ ոչ այնպէս ոք իշխէ մտաց: Երկրորդ անգամ, զի տեսողքն անմիտք էին, եւ տեր խրախութեանն անօրէն քան զամենեսեան: Երրորդ անգամ, ժամն տարժամ, եւ խաղն յկտի: Չորրորդ անգամ, զի աղջկանն վասն որոյ անօրէն հարսանիքն եղեն, քա՛հել պարտ էր՝ յաղագս ծանկանաց մօրն, եւ անօրէն ամուսնութեանն. նա շկթեալ շոպլեալ, մտեալ կա՛մաւէր քան զամենայն պոռնիկ եւրս յայրատագոյն. կոյսն որում ի սենեկէ չէր պարտ արտաքս

⁷ Տե՛ս Գ. ՕՐԴՕՅՈՒՆ, *Античные традиции придворных театров в армянском средневековье. – Третий всесоюзный симпозиум по проблемам эллинистической культуры на Востоке (тезисы докладов)*, Ереван, 1988, с. 62-63.

⁸ Այս բացատրութիւնն են տալիս նաեւ աւետարանական մեկնութիւնները, ուր ասուած է. «Հընայք կ'ատէին ծննդեան օրուան տօնը, բայց Հերովդէսը, ինչպէս կ'ուսանիմք օտար պատմիչներէ, կը հոչակէին այն օրը մեծ հանդիսի, նմանելով յայսմ, ինչպէս ուրիշ շատ քաներու մէջ Հռովմայ սովորութիւններուն» (Մեկնութիւն չորից Աւետարանաց, 4, Պոլիս, 1888, էջ 169):

ելանել, պար առեալ ի մէջ քազմականին իբրեւ գհերատուկ եւ զանուանարկ վագէր»⁹: Առաջին իսկ հայեացքից պարզ է, որ այս համազրութեան մէջ մեկնիչն ընդամէնը համեմատում է Հերովդիադայի դստեր թեթեւաբարոյ կանանց հետ: Եւ դա հասկանալի է. չէ՞ որ նա խնդիր չունի նկարագրելու երեւոյթն իր խաղային առանձնյատկութիւններով: Եւ ընդհանրապէս եկեղեցու հայրերն էական տարբերութիւն չեն տեսնում Հերովդիադայի դստեր հեշտասէր վարքադժի եւ նրա ցուցադրած խաղի գեղարուեստական արտայայտչաձեւերի միջեւ: Դեռ աւելին, քրիստոնէական զրականութեան մէջ միմոս եւ պոռնիկ բառերը շատ յաճախ համարժէք են միմեանց¹⁰, ինչը էական խոչընդոտ է ներկայացնում այսօրինակ հանդիսանքների մասին անկողմնակալ պատկերացում կազմելու համար: Տպաւորութիւնն այնպիսին է, թէ տուփանքն ու զգայականութիւնը սրանց հիմնորոշ առանձնյատկութիւններն են, մինչդեռ որոշ ակնարկներ այնուամենայնիւ մտածել են տալիս, որ խօսքն աւելի բարդ երեւոյթի մասին է: Հէնց այս տեսանկիւնից էլ փորձենք պարզաբանել մէջբերուած հատուածում ընդգծուած բառերն ու բառակապակցութիւնները:

Նախ՝ աւետարանական պատումներում ստուած է, որ Հերովդիադայի դուստրը «կախաւաց ... ի մէջ քազմականին», իսկ Ոսկերբաւնն իր հերթին նրա այդ ելոյթը համարում է խաղ, որ այս դէպքում կը նշանակի «զբօսանք ... փարտար ձգմամբ իրաց, կամ ընթացիւք յասպարիզի, կամ ոստոսումամբ, կամ ծաղրաշարժ հնարիւք», եւ բացի այդ որակում է այն որպէս լկտի, այսինքն՝ լիրք, անպարկեշտ, անառակ, համարձակ¹¹: Կարծես թէ, մեկնիչն ընդամէնը շեշտում է երեւոյթի բարոյական կողմը, սակայն դժուար չէ կռահել, որ նրա համար այն մերժելի է նաեւ իր կենտրոնագանց ընոյթով, ինչն արդէն վերաբերում է խաղի տեսակին: Ի դէպ, կաքաւք բառի իմաստներն էլ՝ saltatio, խաղ ոստոստելոյ, կայթ, պար¹², այդ ենթադրութեանն են մղում:

⁹ ՅՈՎՀԱՆՆՈՒ ՈՍԿԵՐԵՐԱՆԻ ՄԵԿՆՈՒՔԻՆ ԵՎ ԱՎԵՏԱՐԱՆԱՊԵՐՆ ԿՈՄՄԵՆՏԱՐԻ ՄԱՌԻՆԻՍԻ, գիրք Բ, Վեներիկ, 1826, էջ 686:

¹⁰ А. РУДАКОВ, Очерки византийской культуры по данным греческой агнографии, М., 1917, с. 133.

¹¹ Հմմտ. նոր քաղցիք հայկագեան լկտի, հատ. I, Երեւան, 1979, էջ 890:

¹² Նոյն տեղում, էջ 1080:

Ժամանակին աւետարանական թարգմանութիւնների պատմահամեմատական ուսումնասիրութիւնները նոյնպէս թոյլ են տուել ասելու, որ այստեղ խօսք է գնում կենտրոնազանց տարրերով յազեցած ինչ-որ մի պարային ներկայացման մասին¹³: Այդուհանդերձ, շմոռանանք, որ ի վերջոյ գործ ունենք Միջին Արեւելքի հին ժողովուրդներին քաջածանօթ եւ անտարակոյս ծիսական արմատներ ունեցող ինքնատիպ ու բնաշխարհիկ պարային արուեստի հետ, որի վերաբերեալ բազմաթիւ յիշատակումներ կան աստուածաշնչեան նաեւ այլ պատումներում. դա եւ՛ Սամսոնի պարն է փղշտացիների առջեւ (Դատ. ԺԶ, 27-28), եւ՛ Ահարոնի քոյր մարգարէուհի Մարիամի պարն է, երբ թմրուկները ձեռքներին, նրա առաջնորդութեամբ բոլոր կանայք խայտալով ծովից ցամաք են դուրս եկել (Ել. ԺԷ, 20-21), եւ՛ Դաւթի յաղթանակի առթիւ ծննդաներով ու թմրուկներով հրապարակ ելած կանանց պարն է (Ա թագ. ԺԸ, 6), եւ՛ Սելովի աղջիկների պարերն են (Դատ. ԻԱՅ, 21):

Հերովդիսաղայի դասեր խաղարուեստը ծագումնաբանօրէն, ի հարկէ, սերում է այստեղից, բայց եւ առանձնանում է իր իւրօրինակ գրաւութեամբ, ինչն էլ Ոսկերեքանը վերագրում է նրա անպարկեշտ վարքագծին: Որքա՞ն են հեղինակի պատկերացումներն ինքնուրոյն, եւ ի՞նչ չափով են միջնորդաւորուած զբրքային տպաւորութիւններով՝ դժուար է ասել, թէեւ հայերէն թարգմանութիւնն այնուամենայնիւ մտածել է տալիս, որ կեանքից եկող ինչ-ինչ գծեր այստեղ որոշակիօրէն արտացոլուած են: Այս առումով առաւել պերճախօս է յաջորդ բառակապակցութիւնը՝ «պար առեալ ... իբրեւ զհերատուկ եւ զանուանարկ վագեր»: Գրաբարում հերատուկ եւ անուանարկ («անուն արկեալ ի քերամ բագմաց՝ ոչ գովութեամբ»¹⁴) բառերը յաճախ են օգտագործուած որպէս հումանիշներ, սակայն առաջինը նշանակում է ոչ միայն լիրբ, անամօթ, այլեւ հերարձակ, որ այս դէպքում ենթադրում է մագերն արձակած, թօթափած կին¹⁵: Հետաքրքիր է, որ Հերովդիսաղայի դասերը հերարձակ է պատկերում նաեւ Սիմէոն Աղձնեաց եպիսկոպոսը Ը-թ դդ: Աւետարանական այս գրուագը նկարագրելիս նա գրում է. «Եւ զանարէն կազաւսն լկտի եւ րոզահումանի աղնատանս հերարձակ եւ անա-

¹³ J. STRUTT, Sports and Pastimes of the People of England, London, 1830, p. 208.

¹⁴ Նոր քաղցիր՝ հայկազնան լեզուի, հատ. 1, էջ 219:

¹⁵ Նոյն տեղում, հատ. 2, էջ 93:

մաչ առաջի բազմականացն որպէս զանասուն կացուցանէր, եւ արբշտեալ յաղտ ցանկութեան գիւնական գործոյն զմեծ բարկութիւն եւ զանըմբռնելի աղետս անահին գործելով»¹⁶:

Ինչպէս տեսնում ենք, Հերովդիազայի դասերն ուղղակի համեմատուում է մագերն արձակած կանանց հետ, որ հաւանաբար այս կարգի պարուհիներին յատուկ է եղել: Ոսկերերանի ճառերից մէկում հէնց այդպէս էլ պարզորոշ ասուած է. «...գլխնըն պռննիկ, որ մերկագլուխ բազում լրբութեամբ մտանէ ի ներքս. ոսկի հանդերձ արկեալ զիւրեաւ պչրէ, լկնի, երգս նուագէ պռնկական, ցուցս լկտիս, քառքառս արձակէ խննէշս եւ այնչափ պագշտտի»¹⁷: Այս դէպքում արդէն վստահաբար կարող ենք ասել, որ հեղինակն անհամեմատ աւելի ինքնուրոյն է եղել իր բնութագրումները ձեւակերպելիս: Որքան էլ Ոսկերերանի վերաբերմունքը համահունչ է վաղ քրիստոնեաների թատրոնամերժ ճառերին (Տերտուղիանոս, Կիպրիանոս), այնուամենայնիւ նրա ակնարկած խաղի երեք հիմնական բաղադրատարրերը՝ նուագը, երգը եւ պարը, վկայում են, որ խօսքը որոշակի երեւոյթի մասին է, ընդ որում՝ նրա թարգմանչին էլ քաջածանօթ:

Արդ, փորձենք պարզել, թէ ի՞նչ ասել է՝ ցուցս լկտիս, արտայայտութիւնը, որն ասես բերում է՝ նկարագրուած ընդհանուր պատկերում լրացուցիչ մի երանգ ճշտելու նպատակով: Յուցքը (ցուցք, ցնծութիւն, ցոյցք ուրախութեան, հանդէս), որպէս համադրական խաղային երեւոյթ, բաւականաչափ ուսումնասիրուած է¹⁸: Եւ այնուամենայնիւ, պարզաբանման կարիք ունի այն հարցը, թէ ինչու՞ տուեալ համատեքստում հայ թարգմանիչն օգտագործել է ցուցս լկտիս ձեւը, այլ ոչ թէ խաղս լկտիս, ինչպէս աւետարանի մեկնութիւնն է ասում: Արդե֞ք պատճառն այն չէ, որ ցուցք բառն այստեղ ենթադրում է

¹⁶ Մէլերերում է ըստ ՅՈՎՀԱՆՆԻՍԵԱՆ Ն., Թատրոնը միջնադարեան Հայաստանում, Երեւան, ՀՍՍՀ ԳԱ հրատ., 1978, էջ 225 (ընդծումը մերն է - Գ. Օ.):

¹⁷ ՅՈՎՀԱՆՆՈՒ ՈՍԿԵՐԵՐԱՆԻ հատընտիր գիրք եւ նաոք եւ ներքոյեան, Վենետիկ, 1818, էջ 252-253:

¹⁸ ՅՈՎՀԱՆՆԻՍԵԱՆ Ն., Թատրոնը միջնադարեան Հայաստանում, Երեւան, ՀԳԱ հրատ., 1978, էջ 123-136: Այս եզրի մեկնութեան վերաբերեալ տես նաեւ մեր յօդուածը՝ Միմական արուեստի գծերը կիլիկեան միջավայրում, «Պատմա-բանասիրական Հանդէս», 1983, N 1, էջ 117-124:

պարային խաղի ուրոյն մի տեսակ, տարբեր՝ պար կամ կաբալֆ հասկացութեան սովորական ըմբռնումներինց:

Ինչպէս մեր ուսումնասիրութիւններում արդէն ասել ենք, այս բնիկ հայկական խաղի տեսակն ունի նաեւ իր յունական զուգահէտը, որ նոյնպէս ձեւաւորուել է հողագործական աստուածութիւններին նուիրուած կրօնա-ծիսական արարողութիւնների հիման վրայ: Այս միմասական հանդիսութիւնների կենտրոնական կերպարներինց էր երկարավարս պարուհին, որի խաղը՝ ձկուն ու համարձակ շարժումները, միջին դարերում հոգեւոր հայրերը վերագրել են Հերովդիադայի դստեր եւ կամ համեմատել նրա անառակ վարքագծի հետ: Յետագայում էլ՝ ընդհուպ մինչեւ ուշ միջնադար, իսկ յետոյ նաեւ նոր ժամանակներում ձեւաւորուած կրկէսային բազմաժանր հանդիսութիւնները մեծապէս օգտուեցին այդ հնագոյն ինքնատիպ միմասական ձեւերինց:

Ըստ էութեան, մեր առջեւ պարային խաղի միաձոյլ (sincere) մի տեսակ է, որը տարածուած է եղել ոչ միայն առաջաւորասիրական երկրներում, այլեւ ընդհանրապէս հին ժողովրդների մէջ՝ արեւելքինց մինչեւ արեւմուտք¹⁹: Ինչպէս ժամանակին նկատել է արուեստաբան Վ. Դարկեւիչը (В. Даркевич), եւրոպական յուշարձանների շարքում եւս յաճախ կարելի է հանդիպել որմնաքանդակներ, որոնք պատկերում են Սալոմէին կամ էլ նրա կերպարը յիշեցնող կանանց զանազան անվայելուչ եւ արտառոց կեցուածքներով: Ուսումնասիրողն այդ տեսարաններում յստակ դիտարկում է երեք հիմնական առանձնապատկութիւն.

- ա) տեմպատիթմի բազմազանութիւն,
- բ) ձեռքերի վարպետ խաղ,
- գ) ակրորատիկայի տարրեր²⁰:

Հասկանալի է, որ այս պարերի ընդհանուր յօրինուածքն առաջին հերթին համապատասխանեցուած էր երաժշտութեան շեշտերին եւ չափին, ինչն էլ հէնց ապահովում էին աստուածաշնչեան պատումներում յիշատակուող, ինչպէս նաեւ որմնաքանդակների վրայ պատկերուած թմբուկներն ու ծնծղաները ընդհա-

¹⁹ Արեւելիի քատերայիմ խաղերում այդ համադրութիւնը պահպանուել է մինչեւ նորագոյն ժամանակներ՝ Восточный театр, под ред. А. М. Мерварта, Л., «Academia», 1929, с. 11.

²⁰ В. П. ДАРКЕВИЧ, Танцы и акробатика в искусстве средневековья. – Культура и искусство средневекового города, М., изд. «Наука» 1984, с. 8.

նուր առմամբ, սրանք արտայայտիչ շարժուձեւերից կազմուած տեսարաններ էին, ուր առկայ էր ոչ միայն պարը, այլեւ կրկէսն ու մնջախազը՝ կազմելով միաձույլ ամբողջականութիւն:

Հիմա, անդրադառնանք ձեռքերի վարպետ խաղին, որ, ինչպէս ուսումնասիրողն է նշում, նոյնպէս յաճախ կարելի է գիտել որմնաքանդակների վրայ: Կրկին մտաբերենք Խորենացու «Պատմութիւն Հայոց» երկում յիշատակուող Նազինիկի գրուագրը: Թուում է՝ մեր ընթերցած նախորդ օրինակների նման՝ «ի մէջ րագմականին» հանդէս եկող վարձակի գրաւուութիւնն ընդ-գծելու համար, հեղինակը բաւարար չի համարել «յոյժ գեղեցիկ» բնորոշումը եւ աւելացրել է մի պերճախօս արտայայտութիւն եւս՝ «երգէր ձեռամբ», որ գալիս է՝ կարծես պատճառաւորաբար Երգատի անգուսպ վարքագիծը: Չմոռանանք, որ դեռեւս Լեսինգն (Lessing) էր նշում. «Ոչինչ կեանքում այնքան արտայայտիչ չէ, որքան ձեռքերի խաղը՝ յատկապէս յուզումնալի պահերին: Երբ ձեռքերն անշարժ են, ամենարտայայտիչ դէմքն անգամ կարող է տպաւորութիւն չգործել»²¹: Խօսքն այստեղ, ի հարկէ, վերաբերում է գուտ խաղի արտայայտչականութեանը: Մինչդեռ Խորենացու ասածը, կարծում ենք, աւելի շուտ առարկայական իմաստ է կրում, քան այլաբանական, ինչպէս կարող է թուալ առաջին հայեացքից: Համոզուելու համար կրկին դիմենք հնագոյն աղբիւրների մեկնութեանը:

Այսպէս, Ղուկիանոսի (Lucianus) «Յաղագս կախաւաց» երկում նկարագրուած է ճիշտ այդպիսի մի գրուագ, ուր ասում է, թէ Պոնտոսից Ներոնին այցի եկած պատուաւոր մի այր՝ արքայական ցեղից, տեսնելով մնջկատակի խաղը՝ բացականչել է. «Դու հրաշագործ ես: Ես ոչ միայն տեսնում եմ, այլև լսում եմ քո խաղը: Ինչ քու՞մ է՝ քո ձեռքերն են անգամ խօսում»²²: Ի հարկէ, այս դարձուածքը նոյնպէս կարելի է մեկնաբանել՝ իբրեւ յաջող գտնուած փոխաբերութիւն: Սակայն ակնհայտ է, որ եւ՛ ձեռամբ երգելը, եւ՛ ձեռամբ խօսելն ակնարկում են միմեանց շատ հարազատ երեւոյթներ:

Համոզուելու համար դիմենք նաեւ վաղ միջնադարեան հեղինակ Ֆլավիոս Կասիոդորոսին (Flavius Cassiodorus): Այս կապակցութեամբ նա նշում է, որ պանտոմիմոսը միեւնոյն դերն է

²¹ Г.-Э. ЛЕССИНГ, Лакоон, М., Гослитиздат, 1957, с. 120-121.

²² ЛУКИАН, Собрание сочинений, т. II, М.-Л., 1935, «Academia», с. 70-71.

կատարում, ինչ որ՝ երգչախումբը, որ «երգի բովանդակութիւնըն այստեղ բացայայտում է *ձեռքերի միջոցով*» եւ, վերջապէս, որ շարժումն այդ արուեստում «նոյնքան ընթեռնելի է, որքան գիրը գրականութեան մէջ»²³:

Հիմա, կարծում ենք, ակներեւ է, որ թէ՛ անտիկ եւ թէ՛ միջնադարեան իրականութեան մէջ մշտախաղն առաջին հերթին գնահատուել է իբրեւ ձեռքերի արուեստ: Ի հարկէ, ինչպէս նորագոյն ժամանակներում, այնպէս էլ հնում «մշտախաղը խուլ ու համբերի համար նախատեսուած» ներկայացում չէր, այլ «այնպիսի մի իւրայատուկ խաղ, ոգու այնպիսի բացայայտում», երբ գործողութիւնն աւելի արտայայտիչ կարող էր լինել, քան արտասանուող բառը²⁴: Բայց եւ այնպէս, մատենագիր աղբիւրներում հեղինակները նշում են խօսող, կամ երգող ձեռքերի մասին, որ հաւանաբար, ըստ իրենց, աւելի հարագատ է երեւոյթի էութեանը: Իսկ, գուցէ՞՞ այսպէս նրանք իրականում նաեւ տարբերակել են մշտախաղային արուեստն ըստ տարատեսակների, մանաւորապէս պատկերային՝ դիպաշարային մնջախաղը, ոչ պատկերային, այսպէս ասած, զարդանկարային (Decorative) մընջախաղից, որ դիտում ենք եւ՛ պարարուեստում, եւ՛ կրկնային արուեստում:

Փորձենք պարզաբանել խնդիրը:

Մեր հարցադրման հիմքում կրկին խորենացու բնորոշումն է՝ «երգէր ձեռամբ»: Պատահական է, որ պատմիչն առում է երգէր, այլ ոչ թէ խօսէր: Արդեօ՞ք այս բառերը միեւնոյն համագրութեան մէջ միեւնոյն երեւոյթը պէտք է որ ենթադրէին: Կարծում ենք՝ ոչ, եւ ահա, թէ ինչու:

Երկու դէպքում էլ խօսքը, ի հարկէ, մունջ խաղի՝ պանտոմիմոսի մասին է, ուր գործողութիւնը եւ յատկապէս ձեռքերի շարժումներն այնքան արտայայտիչ են, որ լրացուցիչ բացարույթեան կարիք բնաւ չի էլ զգացւում: Ամէն ինչ նմանողութեամբ վերարտադրելու այս արուեստը, ինչպէս գիտենք, գալիս է դեռեւս վաղնջական (archaic) ժամանակներից, իսկ դասական մշակման է ենթարկուել հին (antic) միջավայրի գեղարուեստական մտածողութեան համակարգում: Մեր թուարկութեան Բ դարում արդէն Ղուկիանոսն անդրադարձել է խաղարուեստի այդ

²³ Л. ФРИДЛЕНДЕР, Картины из бытвой истории Рима, ч. 1, СПб., 1914, с. 597.

²⁴ А. ТАИРОВ, Записки режиссера, М., изд. Камерного театра, 1921, с. 31.

տեսակին (Genre) մի ընդարձակ աշխատութեամբ եւ, փաստօրէն, պատմութեան մէջ առաջին անգամ նա փորձել է լուսաբանել մնջախաղը՝ իրբեւ թատերային արուեստի առանձնայատուկ երեւոյթ: Նրա շարադրանքի երկխօսութեան եղանակը թոյլ է տալիս համադրելու միեւնոյն առարկային վերաբերող տարբեր հայեացքներ, որ չափազանց կարեւոր է խնդիրը բազմակողմանիօրէն լուսաբանելու համար: Բանն այն է, որ այդ ժամանակաշրջանում մնջախաղն աննախադէպ վերելք էր ապրում ոչ միայն յունահռոմէական, այլեւ առաջաւորասիական աշխարհում: Ուստի տուեալ փորձը թելադրուած էր նրա տեղն ու նշանակութիւնը թատերարուեստի կողքին՝ որպէս խաղարուեստի ուրոյն տեսակ, իմաստաւորելու անհրաժեշտութեամբ:

Ըստ Ղուկիանոսի, մնջախաղային արուեստն ամէնից առաջ սնուում է առասպելաբանութիւնից, ուստի եւ նրա ստեղծագործական ատաղձը հիմնականում «հեռաւոր անցեալի պատմութիւնն է»՝ Հոմերոսն ու Հեսիոդոսը: Յայտնի է, որ հին յունական թատերագրութիւնը (Drama) նոյնպէս լայնօրէն օգտուել է դիցաբանական առասպելներից ու հերոսապատումներից: Եւ Ղուկիանոսն, ի հարկէ չէր կարող շրջանցել այդ փաստը: Սակայն նա բնաւ էլ նպատակ չունի նոյնացնելու մնջախաղն ու թատերական արուեստը: Ահա թէ ինչու պարտք է համարում անդրադառնալ դրան այսպէս. «Ինչ վերաբերում է խաղի բովանդակութեանը, ապա պարը ոչնչով չի տարբերում ողբերգութիւնից, միայն թէ պարն աւելի քազմազան է, շատ աւելի բովանդակալից եւ այստեղ կերպարանափոխման հնարաւորութիւններն անսահմանափակ են»²⁵: Իսկ միթէ՞ հէնց դա չէ պատճառը, որ Ղուկիանոսի ասած պարը, նոյնն է թէ՛ կախաբը, կոչուել է նաեւ պանտոմիմոս, այսինքն՝ ամէն ինչ նմանողութեամբ խաղարկելու այնպիսի արուեստ, որի արտայայտչաձեւերը նոյնքան հարուստ են ու անպարփակ, որքան հարուստ ու անպարփակ է մարդու երեւակայութիւնը:

Բայց սա դեռ խնդրի մի կողմն է: Որքան էլ Ղուկիանոսի մեկնութեանը համաձայն՝ մնջախաղը տարբերում է թատերախաղից, այնուամենայնիւ նրա գեղարուեստական լեզուն նոյնպէս պատկերային է, այսինքն՝ պատմողական, ներկայացնում է առարկայատես իրադարձութիւնների մի շղթայ: Այդպիսին են նաեւ նրա յիշատակած բոլոր օրինակները, որ վերաբերում են

²⁵ ԼՈՒԿԻԱՆՈՍ, նշ. հրատ., էջ 62:

պարի այդ տեսակին: Ուստի այս առումով, խօսող ձեռքեր արտայայտութեան իմաստն էլ միանգամայն հասկանալի է դառնում: Հեղինակը նկատի ունի մունջ խաղի լեզուով խօսելու, այսինքն՝ պատմելու հանգամանքը: Միեւնոյն ժամանակ Լուկիանոսը նշում է, որ այս արուեստը շատ անելի քովանդակալից է, եւ նրա կերպարանափոխման հնարաւորութիւններն էլ անասիման են: Միթէ՞ այդ չի նշանակում, որ պատկերային լեզուից գատ, մնջախաղն ազատօրէն կարող է օգտուել նաեւ ոչ պատկերային՝ զարդակկարային խաղի արտայայտչաձեւերից, ինչն էլ թերեւս յատուկ է մաքուր պարին, որի հէնքն արդէն բանաստեղծական երգն է եւ երաժշտութիւնը²⁶:

Ուսումնասիրութիւնները նոյնպէս ցոյց են տուել, որ մնջախաղն իր արտայայտչալեզուի ձեւաբանական առանձնայատկութիւններով բաժանուում է երեք տարատեսակների՝ քստերական, պարային, եւ գաւեշտի կամ կրկեսային²⁷: Վերջին երկուսը, ի հարկէ, պատկանում են ոչ պատկերային՝ զարդակկարային (decorative) խաղարուեստի շարքին, քանի որ դրանց ծագումնաբանական կառուցուածքի հիմքում մաքուր ձեւն է: Պատմութիւնից էլ գիտենք, որ սրանք յաճախ նաեւ լրացրել են միմեանց: Եւ հէնց այս հանգամանքն էլ, կարծում ենք, արտայայտուած է *Խորենացու խօսքերում*՝ «Երգէր ձեռամբ»: Իսկ թէ, վերոնշեալ երկու տարատեսակներից որն է այնուամենայնիւ այստեղ գերակշռել, կարող ենք միայն կռահել՝ դատելով տուեալ ժամանակաշրջանին բնորոշ այս կարգի հանդիսութիւնների մասին մեզ հասած տեղեկութիւնների հիման վրայ:

Այդպիսի մի խաղ էր, ինչպէս արդէն ասուեց, Հերովդիազայի դատեր ելույթն «ի մէջ բազմականին», որի երրորդ բազմաբաժնի պարուհու մարմնակուն շարժումներն էին: Ընդ որում, նկատենք, որ նրա պարն այդպիսին է ներկայացուել հէնց միջնադարեան յուշարձաններում: Գլխիվայր, ձեռքերը յատակին յենած կամ էլ իրանը կորածեւ շրջելիս²⁸: Ակորդատիկ հնարքներն ընդհանրապէս յատուկ են այս կարգի միմոսական խաղերին: Մտարերէնք Այգեկցու խօսքերը՝ «Եւ եղայք իբրև զայն, որ յիմար է, եւ գոտս ի վեր կանգնէ, եւ ի վերայ գլխոյն

²⁶ Հմմտ. М. КАГАН, Морфология искусства, Л., 1927, с. 403-409.

²⁷ Տե՛ս՝ А. РУМНЕВ, О пантомиме. Театр. Кино, М., 1964, с. 11; Пантомима и ее возможности, М., 1966, с. 6-9.

²⁸ В. П. ДАРКЕВИЧ, նշ. աշխ., էջ 10-11:

երթայ»²⁹: Յիշենք նաեւ ժԳ զարի կիլիկեան ձեռագրերից մէկում («Ութ մանրանկարիչների աւետարան») պատկերուած «Քրիստոսի ծանակման» հետեւեալ տեսարանը. Քրիստոսի առջեւ երաժիշտ գուսանների նուագակցութեան տակ պարուհի վարձակը (որ այստեղ կին է պատկերուած, վկայում են ոչ միայն նրա հագուստն ու մարմնի կառուցուածքը, այլեւ երկար քօթափած մագերը) իրանը թիկունքով թեքել, յենուել է ձեռքերի ու ոտքերի վրայ՝ «կամրջակի» պէս³⁰: Քրիստոսից ձախ՝ ետին շարքն են մնացել զինուորները, որոնք էլ, ըստ աւետարանական պատումի, կատակել ու անարգել են նրան՝ ասելով «Ո՛ղջ լեր, թագաւոր հրէից» (Մատթ. Իէ, 29): Վիզէն Ղազարեանի բացատրութեամբ՝ «ըստ երեւոյթին նկարչի համար տհաճ է եղել պատկերել նշուած արգահատելի եւ ամօթալի տեսարանները (Քրիստոսին մերկացնելը, եղէգով գլուխը ծեծելը, երեսին թքելը) ... բայց ահա «կատակէին» բառը բաւական էր, որպէսզի բորբոքուի նկարչի երեւակայութիւնը: Ինչու³¹: Որովհետեւ, եթէ, ըստ «Նոր հայկագեան բառգրքի» կատակելմ բառի առաջին նշանակութիւնն է «կատակ աւնելով ծաղրել», ապա յետոյ միայն «հեզնել, երգիծանել», ապա բայարմատը՝ «կատակ», ըստ այդ նոյն բառարանի, բացի «ծաղրից» նշանակում է «կատակերգակ. ծաղրածու, հացկատակ»: Եւ տեսէք. Քրիստոսին լլկողները քաշուած են երկրորդ շարք... իսկ գլխահակ Քրիստոսի առաջ տեսնում ենք երկու «կատակի», որոնք յիրաւի «կատակէին»³¹: Այս բացատրութիւնը մեզ միանգամայն համոզիչ է երեւում, եթէ նկատի առնենք, որ «ի մէջ բազմականին» հանդէս եկող պարուհի վարձակները յաճախ ցուցադրել են նաեւ կատակային, զաւեշտական բնոյթի լկտի («ցուցս լկտի»), ասել է, թէ՛ կենտրոնազանց արարքներ: Միջնադարեան հեղինակները, ի հարկէ, սովորաբար այդ պարուհիներին կատակ չեն անուանում, սակայն

²⁹ Նոյն տեղում, ձեռ. N 8356, էջ 101ր:

³⁰ Մաշտոցի անուան Մատենադարան (այսուհետեւ՝ ՄՄ), ձեռ. N 7651 «էջ 79ա: Այս փաստը ներկայացուած է նաեւ Է. Պետրոսեանի «Թատերական գծերը միջնադարեան մանրանկարներում» աշխատութիւնում՝ «Դիւահարի բժշկումը» անուան տակ (տե՛ս Հայ ազգագրութիւն եւ քանակիւսութիւն, 7, Երեւան, 1975, էջ 186): Սակայն, կարծում ենք, մանրանկարում պատկերուած աւետարանական դրուագի ճիշտ անուանումը տալիս է Վ. ՂԱՁԱՐԵԱՆԸ «Սիւծետային մանրանկարը կիլիկիայում» աշխատութիւնում (Երեւան, 1984, էջ 27):

³¹ ՂԱՁԱՐԵԱՆ Վ., նշ. աշխ., էջ 28:

միջնադարեան արուեստում նրանց յաճախ են պատկերել հենց կատակալին կեցուածքով, որ անկասկած ըխել է ներկայացրած պարային խաղի բնոյթից:

Այստեղ աւելորդ է յիշատակել նաև Վարդան Այգեկցու «Թէ որպէս երեւեցաւ ախտ շնութեանն» առակը³², ուր կիրիկեան գուսանների ու վարձակների արուեստը բնութագրելով՝ հեղինակը դիմում է հին կտակարանի պարականոն առասպելապատումներին. «...ցաւ եւ ցանկութիւն շնութեան բուսաւ յառաջագոյն յորդուցն կայենի այսպէս: Զի որդիքն Սեբա[յ] նախատէին զագգն կայենի, եւ նոքա ոչ կարացին համբերել. այլ խորհեցան կորուսանել զորդիքն Սեբա[յ] զի այլ մի նախատեսցեն զնոսա: Եւ յարեաւ կին մի յագգէն կայենի եւ չար դիւացն խորհրդակցութեամբ արուեստեալ կազմեաց զգարդարանսն դատերաց ագգին կայենի, եւ հուսականսն եւ զծամակալսն գլխոց նորա, զդեղ երեսացն զսընկոյր աչացն, եւ գայլսն ամենայն եւ պննազարդեալ դիւանման խնկեշացոյց զնոսա: Եւ դարձեալ յարեաւ այր մի ի նոյն ագգէն կայենի, եւ արուեստեալ՝ կազմեաց դիւացն ձեռնտուութեամբ զամենայն քաղցրաձայնս, զփողս, եւ ըզջնարս, զտասնաղիս եւ զձնծղայս, ըզքմպուկս, եւ զքնարս, եւ գայլս ամենայն»³³:

Սկզբից եւեթ, արտաքին յարդարանքի միջոցներն ընդգծելով, որոնց կիրառման նշանակութիւնը նոյնպէս շատ թատերային է, Այգեկցին սկսում է թուարկել այն երաժշտական գործիքները, որոնք, անշուշտ, պէտք է որ իրեն ծանօթ լինէին նրմանատիպ հրապարակային խաղերից: Ընդ որում նկատենք, որ ամէն մի լարային գործիքի կողքին՝ զուգահեռաբար նա նշում է նաև փողային կամ հարուածային որեւէ մի գործիք. փող եւ ջնար, ձնծղայ եւ տասնաղի, քմբուկ եւ քնար: Սա էլ պատահական չէ, քանի որ կրկէսային տարրերով յաղեցած այս կարգի խաղերը, ինչպէս արդէն ասուեց, ունէին ինքնատիպ երաժշտական կառուցուածք, որին համապատասխան իրար յաջոր-

³² Н. МАРР, Сборники притч Вардана, т. III, СПб., 1894, с. 80-81. Առակը բերում ենք Մաշտոցի անուան մատենադարանի N 8356 ձեռագրից (1322 թ.), որը Ն. Մառի օգտագործած ձեռագրերի թւում ընդգրկուած չէ եւ նրանց համեմատ ամենահինն է:

³³ ՄՄ, ձեռ. N 64ա-64բ (այս եւ յետագայ ընդգծումները մերն են - Գ. Յ.):

դող զարդանկարային պարային ձեւերը շեշտակիօրէն խախտում էին ակորդատիկ վարժութիւնների ցուցադրումով:

Հիմա, տեսնենք, թէ ինչպէ՞ս են, Այգեկցու խօսքերով ասած, Կայենի որդիներն իրականացրել իրենց նպատակը. «Նւ եկեալ ժողովեցան ի մի վայր, զարդարեցին զկանայսն, եւ սկսան ուտել եւ ըմպել, եւ հարկանել զհաղցրահնչաւոյ երգարանս. ծափս հարկանէին եւ խայտային, կայթէին եւ խաղային եւ ցնծալով երգէին: Նւ զայն տեսեալ որդոցն Սեթա[յ]. եւ ահա եռաց եւ շարժեցաւ սակաւ սակաւ շնութեան ցանկութիւն ի սիրտս նոցա դիւացն արկածիւմ: Նւ եկեալ առ որդիքն Կայենի սկսան ուրախանալ. եւ մտեալ խառնակեցան ընդ Կայենի դստերացն շնութեամբ...»³⁴:

Թէեւ մեր ընթերցած առակի երկու մասերն էլ իրենց բովանդակութեամբ փոխառնուած են պարականոններից, այնուամենայնիւ Այգեկցին այստեղ համեմատաբար աւելի ինքնուրոյն է³⁵, քան վերելում դիտարկուած մանրանկարի հեղինակը: Կայենի որդիների եւ դուստրերի կազմակերպած խանդավառ խրախճանքի նկարագրութիւնն իր բնոյթով յիշեցնում է հռոմէական շրջանի մի որմնանկարում պատկերուած եզիպտացի միմոսների հանդէսը³⁶, որտեղ նոյնպէս տեսնում ենք ծափ, կայթիւն, խաղ, ցունձք, երգ՝ (հմմտ. ձուցք բառի բացատրութեան հետ): Յայտնի է, որ Հռոմի լաւագոյն միմոսներն ու պանտոմիմոսներն ի-

³⁴ Նոյն տեղում, էջ 64բ-65ա:

³⁵ Հմմտ. «...Իսկ աղջկունքն ազգին Կայենի, հնարիւմ սահմանեցին զկարմրադեղն եւ զսպիտակադեղն, [որովք] գերեսս կարմրացուցանէին եւ սպիտակացուցանէին, գունքն քաշեցին եւ զաչան դեղեցին եւ ծարուր դրին, ըզծաւն եւ զվար[ս]ն սահմանեցին, եւ այլ պէսպէս սազ եւ երգարանս սահմանեցին. գոտսն եւ գճեոսն խիմեցին եւ կարմրեցուցին, եւ այլ զարդարանօք զմարմնս իւրեանց զարդարեցին եւ պննեցին: Նւ այնպիսի պննեալ զգետիւմ էւ ազգի ազգի նշանակօք՝ գնացին ի լեառն խնդալով եւ պարելով, ծափ տալով եւ փոշս հնչեցուցանելով, երկայն ածելով եւ պէսպէս ձայնի նշանակելով խառնեցան ընդ որդոցն Սեթալ...» (Թանգարան Հին եւ Նոր նախնեաց), հատ. Ա, «Անկանոն գիրք Հին կտակարանաց», Վենետիկ, 1896, էջ 321): Համեմատելով պարականոնի բնագիր տեքստում ընդգծուած տողերը Այգեկցու առակից մէջբերուած հատուածի հետ, յստակ տեսնում ենք եւ՝ նրանց ընդհանրութիւնը, եւ՝ միաժամանակ ակնյայտ տարբերութիւնը:

³⁶ O. JAHN, Die Wandgemälde des Columbariums in der Villa Pamfili mit Enlätuterung, München, 1862. Taf. IV, 12.

րենց արուեստը մշակել են ինչպէս Գազայում եւ Անտիոքում (Ասորիք), այնպէս էլ Ալեքսանդրիայում (Եգիպտոս)³⁷։ Այդ աւանդույթը պահպանուել է նաեւ միջին դարերում։ Յիշենք, որ բիւզանդացի մի հեղինակ հիացմունքով է խօսել Եգիպտոսից ժամանած թափառաչրջիկ կրկէսային խմբի մասին, որը մինչ այդ ելոյթներով հանդէս էր եկել նաեւ Հայաստանում³⁸։

Համաձայն Օտտոյ Եանի (Otto Jahn), որը ժամանակին վերծանել է վերոնշեալ որմնանկարը, այստեղ պատկերուած տեսարանի երկու կենտրոնական դէմքերը պատկանում են cinaedus (անպարկեշտ գրոյցներ վարող եւ սանձարձակ, լկտի շարժուձեւերով պարող) կոչուած միմոսների շարքին³⁹։ Գերմանացի գիտնականը նշում է, որ որմնանկարի հեղինակն ընտրել է այն պահը, երբ պարողները միաժամանակ երգում են անպարկեշտ բովանդակութեամբ մի երգ։ Տուեալ դէպքում այս հանգամանքն էական է այնքանով, որ առակի երկրորդ մասում Ալգեկցին յանգում է հեռեւեալ բարոյախօսութեանը. «Նւ այսու մեծ կորստեամբ ոչ յագեցաւ անիծեալ վիշապն սատանայ այլ սովաւ եմուտ մարդկան, եւ ի նոյն շնութեամբ, ցանկութիւն ջերմացուցանէ եւ յորդորէ զամենայն մարդ մինչեւ ի կատարումն։ Ապա յիրաւի գրեցին սուրբքն աստուծոյ, թէ պննաւդ եւ զարդաւեր կինն բնակարան է պիղծ դիւացն, նման դստերն Հերովդիադայ, որ դիւանման պննեալ իննեւացաւ եւ կախաւելովն ետ հատանել զգլուխ երանահրաշ մեծ մարգարէին Յովհանու նաեւ այս յիրաւի գրեցաւ թէ գուսանն կոչնական է սատանայի եւ դիւաց նորա, Բանգի Բաղքառնչաւդ երգարանաւքն շարժէ զցանկութիւն շնութեան, զի մարմաջեալ հեշտացուցանէ զմարմինն»⁴⁰։

Մարմնաճկունութեան տարբերով յագեցած այս խաղերի ժամանակ սովորաբար հանդէս եկող կին ձեռնածոնները միաժամանակ, եւ՛ պարել են, եւ՛ նուագել որեւէ երաժշտական գործիքի վրայ, որը կարող էր լինել, թէ՛ հարուածային, թէ՛ լարային⁴¹։ Ուստի շատ հաւանական է, որ նագինիկը նոյնպէս այդպիսի մի

³⁷ H. REICH, նշ. աշխ., էջ 699։

³⁸ Տե՛ս Ս. Օ. БЕЗОБРАЗОВ, Очерки византийской культуры, Петроград, 1919, с. 147-148.

³⁹ O. JAHN, նշ. աշխ., էջ 26-29։

⁴⁰ ՄՄ, ձեռ. N 8356, էջ 65բ։

⁴¹ В. П. ДАРКЕВИЧ, նշ. աշխ., էջ 13։

գործիքով է հանդէս եկել, ինչը թերեւս աւելի հասկանալի է դարձնում ձեռամբ երգէր արտայայտութեան իմաստը: Չմոռանանք, որ նորագոյն կրկէսի պատմութեանն էլ յայտնի են այդպիսի համարներ. դեռեւս Ֆիլիպ Ասթլէի (Philippe Astley) կրկէսում էին կին լարախաղացողներն ու ձեռնածուները (jongleur) հանդէս գալիս երաժշտական գործիքներով⁴²: Սա մի իւրայատուկ խաղային արուեստ է, որ ըստ երեւոյթին, գալիս է հնագոյն ժամանակներից եւ դարերի ընթացքում կարծես չի փոխել իր համադրական բնոյթը, ինչն էլ ըստ էութեան պայմանաւորուած է այդ խաղարուեստի սեռային պատկանելութեամբ: Խօսքն այն ձեւաբանական առանձնայատկութիւնների մասին է, որոնցով այս կարգի խաղերն առանձնանում են տարածաժամանակային արուեստների շարքում՝ պարարուեստից եւ թատերարուեստից:

Վերոյիշեալ բոլոր օրինակներում ըստ էութեան խօսքը վերաբերում է հէնց այն տիպի խաղերին, որտեղ երգ ու պարի, ակորդատիկ մնջախաղի ու արտառոց շարժուձեւերի միջոցով բացայայտ ի ցոյց է դրուել ոչ միայն մարդու ֆիզիկական, այլեւ զգայական բնութիւնը: Ուստի միանգամայն հասկանալի է, թէ ինչու միջնադարում քրիստոնեայ հեղինակներն էլ առիթը բաց չեն թողել զգուշացնելու. «Մի՛ տեսցէ ակն զգարշելիսն եւ մի՛ լուիցէ ունկն գերգս պոռնկական»⁴³: Իսկ մի առիթով, ինչպէս արդէն գիտենք, Սարգիս Շնորհալին նաեւ խոստովանել է. «Յերգս լկտութեան եւ ի կատակերգութեան առաւել հեշտանամբ»⁴⁵: Միեւնոյն անհանգստութիւնն է արտայայտել նաեւ Գրիգոր Մարաշեցին. «Վա՛յ ձեզ լսելիք իմ զի լուայք գձայն լկտի երգոց դիւական. եւ ընդունեցայք զբանս խարէութեան եւ ստութեան»⁴⁶: Այս վկայութիւնները համեմատելիս գալիս ենք այն եզրակացութեան, որ նրանց մերժման առարկան նոյնն է ոչ թէ իր բնոյթով՝ որպէս աշխարհիկ զուարճանքի մի դրսեւորում, այլ իր ձեւով, որպէս կենտրոնազանց խաղի տեսակ:

⁴² Д. ЖАНДО, История мирового цирка, М., 1984, с. 13.

⁴³ Այդ մասին մանրամասն տե՛ս Գ. ՕՐԴՈՅԵԱՆ, Հին եւ միջնադարեան կրկէսային խաղերի ձեւաբանական առանձնայատկութիւնները. «Պատմա-բանասիրական հանդէս», N 2, 2007, էջ 236-247:

⁴⁴ ՄՄ, ձեռ. N 2890, էջ 202բ:

⁴⁵ ՍՍԲԳԻՍ ԾՆՈՐԱԼԻԻ, Թուրք ընդհանրական, Վեներիկ, 1838, էջ 172:

⁴⁶ ՄՄ, ձեռ. N 108, էջ 46ա:

Եւ դրա անուանումը կրկին հանդիպում ենք Մարաշեցու խօսքում. «Ոչ ակն ակնարկելով տեսանէ զանպատշաճսն, - զգուշացնում է նա իր «Վայք ողբոցներում», - ոչ ունկն լսէ զլիտի եւ ցցասաց բանն»⁴⁷: Յցասաց բառը, որ նշանակում է «ասացեալն իբր ըզցուցս աշխարհական երգոց»⁴⁸, վտահօրէն կարելի է ասել՝ ենթադրում է նաեւ cinaedus եզրի իմաստը:

Այստեղից էլ հասկանալի է դառնում, թէ ինչու կրկէսային գանազան խաղերի հետ մէկտեղ գրեթէ միշտ ցուցադրուել են նաեւ նմանօրինակ պարային տեսարաններ: Յիշենք, որ պատմիչի վկայութեամբ, Արծրունեաց իշխանաւորների առջեւ՝ զազանափարծների, սուսերամարտիկների ու ըմբշամարտիկների կողքին հանդէս են եկել նաեւ «դասս գուսանաց եւ խաղս աղջկանց զարմանալոյ արժանիս»⁴⁹: Արդեօ՞ք այստեղ «զարմանալոյ արժանիս» արտայայտութիւնը չի ենթադրում, որ խօսքը սովորական պարային խաղի մասին չէ: Ելնելով հեղինակի համատեքստից՝ կարծում ենք՝ այդ խաղն ուղղակի համեմատուում է կրկէսային գարմանագործների արուեստի հետ⁵⁰: Այս կապակցութեամբ աւելորդ չէ յիշել նաեւ 1673 թուին Ֆրանսիացի ճանապարհորդ Շարդենի (Chardin) նկարագրած հանդիսութիւնը, որ ներկայացուել է Երեւանի սարգարի (նահանգապետ) պալատում: Այդ ներկայացման ընդհանուր տպաւորութիւնը, - նկատել է Հ. Յովհաննիսեանը, - ...մեզ տանում է հայկական վաղ միջնադար, Մայրագոմեցու եւ Սիմէոն եպիսկոպոսի ժամանակների թատրոնը: Ներկայացումը սկսուել է ըմբշամարտութեան ցոյցով, որից յետոյ խաղացուել է Ֆարսային-էրոտիկական բովանդակութեամբ մի սիւժէ: Ներկայացման մասնակիցներին Ֆրանսիացի ճանապարհորդն անուանում է Արեւելքի միմոսներ (mimes d'Orient) եւ կատակերգուներ (comediens): Շարդենն իր տեսածը համեմատում է երգախաղի (opera) հետ, բայց եթէ այսօրուայ թատերական

⁴⁷ ՄՄ, ձեռ. N 7013, էջ 64ա:

⁴⁸ Նոր բառգիրք հայկազեան լեզուի, հատ. 2, էջ 920:

⁴⁹ «...Ընդ նմին եւ դասս գուսանաց եւ խաղս աղջկանց զարմանալոյ արժանիս. անդէն եւ սուսերամերկաց հոյլ՝ եւ ըմբշամարտաց պատերազմունք. անդ եւ դաս՝ առիւծուց եւ այլոց» (Թովմայ Արծրունույ Պատմութիւն տանն Արծրունեաց, Թիֆլիս, 1917, էջ 20):

⁵⁰ Հմմտ. ՕՐԴՈՒՆԵԱՆ Գ., Կրկէսային խաղի ձևակերտման սկզբունքները. «Հանդէս» (գիտական յղուածների ժողովածու), N 7, Երեւան, 2007, էջ 16-18:

Հասկացութիւններով կողմնորոշուենք, դա իր ընդթով նման է եղել՝ այսօր երաժշտապար (musical) կոչուող տեսակին (genre): Այստեղ զուգորդուած են տրամախօսութիւնը, երգը, միմականպարախաղային ընդմիջումները. երգուել են չափածոյ հատուածները, իսկ արձակը չի մտել երգի մէջ՝ ներկայացուել է դրամատիկական ձեւով: «Առաջին գործողութեան մէջ, - շարունակում է Շարդենը, - ներկայացում է սիրոյ հմայքը, երգում են պաշտօնութիւնն ու գրգանքը. հանդէս են բերում զեղեցիկ տղաներ ու աղջիկներ: Երկրորդ գործողութիւնում խումբը բաժանում է երկու կողմերի՝ հետապնդող սիրահարները եւ նրանցից խուսափող գեղեցկուհին, երրորդ գործողութիւնում կայանում է հաշտութիւն՝ յաղթանակում է սէրը»⁵¹:

Ժ. Ղարում Շարդենի (Chardin) նկարագրած այս խաղերին շատ նման տեսարաններ կարելի էր գիտել նաեւ ԺԹ. դարավերջին եւ ի. դարասկզբին ասպարէզ եկած նուագասրահներու (music-hall) եւ պէսպիսութիւններու (variété) մէջ, որոնք ի վերջոյ գրեթէ մէկ դար առաջ ձեւաւորուած թատրոն-կրկէսների տարատեսակներից էին: Սակայն Ասթլիցի (Astley) եւ նրա հետևորդներից էլ շատ աւելի վաղ՝ հնագոյնից մինչեւ ուշ միջնադար, կրկէսային խաղերի այս պայմանաձեւերը հայ իրականութեան մէջ ցուցաբերում են զարմանալի կենսունակութիւն՝ գրեթէ անփոփոխ պահպանելով իրենց ձեւաբանական կառուցուածքը: Դրա վառ ասպնոցը դարձաւ նաեւ 1846 թուականին ստեղծուած «Արամեան թատրոն-կրկէսը», որն իր խաղացանկում, բացի զուտ կրկէսային համարներից, ներառեց նաեւ պարային եւ մնջախաղային տեսարաններ:

Եւ այսպէս, մեր հետեւութիւնն այն է, որ միջնադարեան հայ գուսանների ու վարձակների արուեստին յատկանշական էին կենտրոնազանց (eccentric) տարրերով յագեցած պարն ու մնջախաղը: Ընդ որում դրանք իրար հետ սերտօրէն միահիւսուած էին, եւ կրկէսային լարախաղութեան, երգի ու երաժշտութեան համադրութեամբ ներկայացնում էին ինքնատիպ մի խաղ՝ ցուցք, որ դիտուում է հայ իրականութեան մէջ անյիշելի ժամանակներից, եւ պահպանելով իր ձեւաբանական առանձնայատկութիւնները՝ հասնում է մինչեւ նոր եւ նորագոյն ժամանակներ: Սակայն դեռեւս միջին դարերում հէնց այդ խաղի տեսակը նկատի ունենալիս հայ հեղինակները միշտ չէ, որ օգտագործել են դրա

⁵¹ ՅՈՎ. ՀԱՆՆԻՍԵԱՆ Ը., Թատրոնը միջնադարեան Հայաստանում, էջ 279.

արխայիկ անուանումը, իսկ յետագայում ցուց արմատից կազմուած մի շարք ձևեր գործածական են դարձել գերազանցապէս ժողովրդի խօսակցական բառապաշարում⁵²: Ուստի փորձենք վերջնականապէս յատկել այդ խաղի այն հիմնական յատկանիշները, որոնք ժամանակի ընթացքում, ըստ էութեան չեն փոխել իրենց ծագումնային կազմութիւնը՝ իրրեւ գեղարուեստական արտայայտութեան ձև:

Նախ՝ ամէն մի այդպիսի խաղ կենտրոնազանց է՝ իրրեւ արտասովոր Ֆիզիկական արարքներից կառուցուած գործողութիւն, որը կարող է ունենալ թէ պատկերային՝ դիպաշարային հիմք, եւ թէ ոչ պատկերային՝ շարժման զարդանկարային կամ դեկորատիւ նկարագիր: Ի դէպ, այս երկու տարատեսակներն առկայ են նաեւ պարարուեստում: Առաջինն իր արտայայտչալեզուով մօտենում է թատերարուեստին, իսկ երբ պայմանական խաղի պատկերային տարրերը դառնում են գերակշռող, ապա պարը վերածում է մնջախաղի: Սրան հակառակ է մաքուր պարը, երբ իւրաքանչիւր ոչ պատկերային շարժում գերազանցապէս համապատասխանեցուած է երաժշտութեան մեղեդայնութեանն ու հնչերանգներին: Թերեւս, չէնց այս երկու դէպքում է, որ կրկնէսին նոյնպէս յատուկ թատերային պայմանաձեւերը, կարծես, մերձենում են մէկ պարարուեստին, մէկ էլ թատերարուեստին. այստեղ նրանց շփման եզրերն առաւելագոյնս շօշափելի են: Սակայն չէնց այս կէտերում էլ նրանց առերեւոյթ ընդհանրութիւնը, փաստօրէն, սահմանափակում է, քանի որ հակառակ դէպքում կը խախտուէր այդ արուեստներին յատուկ ծագումնաբանական կառուցուածքը: Որքան էլ կրկնային պարն ու մնջախաղը համեմատելի են վերոնշեալ յարակից արուեստների հետ, այնուամենայնիւ կենտրոնազանց խաղն այստեղ մնում է գերակշռող, որ արտայայտում է մարդու եւ ընդհանրապէս կենդանական ու առարկայական աշխարհի ֆիզիկական բնութեան արտասովոր դրսեւորմամբ: Մի շարք այդպիսի կենտրոնազանց խաղեր, իրենց զուտ կրկնային արտայայտչակերպով մինչեւ օրս էլ մնում են անփոփոխ: Դրանք են. ակրորատիկ եւ ձեռնածուական հնարքներից կառուցուած պարային կամ էլ մնջախաղային այն համարները, երբ ցուցադրուում են ճկունութեան եւ ճարպիկութեան բացառիկ, իրենց բնոյթով արտասովոր, զարմանալի

⁵² Այդ մասին մանրամասն տե՛ս Յովհ. Ա.Ն.ՆիՍԵԱՆ Է., Թատրոնը միջնադարեան Հայաստանում, էջ 129-130:

վարժուժի հիւնքեր: Ընդ որում, այդ կենտրոնազանց հնարքներն առանձնանում են նաև իրենց ձեւակերտման եղանակով, որպէս միջնորդաւորուած ձեւեր, քանի որ այդպիսի խաղերի մէջ շատ յաճախ ներգրաւուած են լինում, ոչ միայն մարդիկ, այլև գանազան իրեր (դրանց թւում՝ երաժշտական գործիքներ), կենդանիներ կամ գազաններ, ինչն էլ ժամանակին ընկալուել է, որպէս հմայանք կամ կախարդանք եւ, բնականաբար, դասուել չար արուեստների շարքին:

Երկրորդ առանձնայատկութիւնը վերաբերում է խաղի մատուցման ձևին, որ կրկէսային արուեստում սկզբունքային նշանակութիւն ունի: Այստեղ է, որ կրկէսային խաղն իրապէս ձեռք է բերում գեղարուեստական արժէք, եւ այստեղ էլ կրկէսային արուեստը սկզբունքորէն տարբերում է թատերարուեստից եւ պարարուեստից: Ինչպէս արդէն նշել ենք, կրկէսում ամէն ինչ իրական է ու բացայայտ. ճշմարտացիութեան պատրանք ստեղծելու ամէն մի փորձ կարող է խարխիւել նրա խաղային համակարգն իրբեւ ամբողջութիւն: Դա ամէնից առաջ վերաբերում է այն արտասովոր հնարքներին, որոնցից էլ կառուցւում է կենտրոնազանց գործողութիւնը սկզբից մինչեւ վերջ: Չէ՞ որ իւրաքանչիւր այդպիսի արարք կարող է զարմանալի կամ ծիծաղելի լինել, երբ անպասելի է, այսինքն, երբ հակառակ է առողջ տրամաբանութեանն ու իրերի բնականոն ընթացքին: Ուստի, որքան հաւաստի ու առարկայական են այդ հնարքներն իրբեւ ֆիզիկական արտայայտութիւն, այնքան ներգործուն է դժբանց անպասելիութեան արգասիքը: Եւ այդուհանդերձ, սա վերաբերում է խաղի միայն արուեստագիտական (technological) կառուցուածքին, որ ժամանակի ընթացքում եւ՛ բարդանում է, եւ՛ կատարելագործւում: Հնագոյն եւ ժամանակակից կրկէսային ձեւերի համեմատելի դժերն առաջին հերթին պայմանաւորուած են այդ խաղերի բնոյթով՝ կենտրոնազանց գործողութիւն կառուցելու սկզբունքների ընդհանրութեամբ: Ինչ վերաբերում է վարպետութեան աստիճանին, ապա սերնդէ սերունդ միեւնոյն հրնարքներն ու արտակարգ հնարանքները արուեստագիտականօրէն այնքան են հարստացել ու յղկուել, որ այսօր դրանց ծագումնաբանական արմատներն անգէն աչքով այլեւս տեսանելի էլ չեն՝ միայն ձեւաբանական քննութեան եղանակով է հնարաւոր դառնում ի յայտ բերել դրանց տիպաբանական կապը եւ պարզել այն ներքին օրինաչափութիւնները, որոնք յատուկ են եղել այդ արուեստին բոլոր ժամանակներում: Խօսքն այս դէպքում այն մա-

սին է, որ ամենաբարդ արտակարգ հնարքներից կառուցուած գործողութիւնն անգամ՝ ընդգծուած անսպասելիութեան պարագայով հանդերձ, դեռեւս լիարժէք կրկէսային արուեստի արտայայտութիւն չի դառնում, եթէ միաժամանակ չի առաջացնում նաեւ գեղագիտական յուզմունք: Ինչպէս դիպուկ նկատել է կրկէսի անուանի պատմարան Դոմինիկ Ժանդոն (Dominique Jan-do), «եղել են ու կան չափազանց օժտուած լարախաղացներ, որոնք կարող են հրաշքներ գործել, եւ չնայած դրան բնաւ էլ ժողովրդականութիւն չեն վայելում: Դրա պատճառն ըստ էութեան այն է, որ նրանք գուրկ են գեղարուեստական հոտառութիւնից, ինչը թոյլ կը տար համապատասխան «ձեւի մէջ» մատուցել համարը... Կրկէսը սոսկ մարզական ելոյթների սպարէզ չէ. կրկէսը արուեստ է»⁵³:

Կրկէսային արուեստի այդ առանձնայատկութիւնը կարելի է դիտարկել, թերեւս, հէնց այն օրինակների հիման վրայ, որոնք այստեղ քննութեան առանք իրրեւ թատերային պայմանաձեւեր: Եւ՝ Հերովդիադայի դստեր պարը, եւ՝ Նագինիկի ելոյթը, եւ՝ բոլոր միւս խաղերը, որոնց անտարակոյս յատուկ էին միմոսական արուեստի գծերը, կառուցուել են հակադրութիւնների (contrast) վրայ, ինչով էլ փաստօրէն պայմանաւորուել է այստեղ անսպասելիութեան պարագան: Հերովդիադայի դստեր դէպքում այդ պարագան առաւելագոյն արտայայտուած է թէ՛ աւետարանական մեկնութիւններում, թէ՛ պատկերազրական յուշարձաններում. նա ցուցադրում է բարդ ակրորատիկ վարժութիւններ, իսկ Եփրեմ Ասորու նկարագրած տեսարանում՝ շարունակում է պարել անգամ սատոյցի վրայ⁵⁴: Չեռքերով խաղալու Նագինիկի բացառիկ հմտութիւնը, որ Խորենացու «երգէր ձեռամբ» փոխարեքական արտայայտութեան մէջ արդէն իսկ կառուցուած է միմեանց հետ տրամաբանօրէն չկապակցուող հասկացութիւններից, կարծես, ուղղակի աղերսում է նաեւ ձեռնածուական արուեստին յատուկ հնարքներին, ուր ձեռքերի ճարպկութիւնն առանձնակի է կարիւրուում: Սակայն այս տիպի ամէն մի արուեստագիտական հնարանք չէր դառնայ յիշարժան երեւոյթ, եթէ ներկայացուած չլինէր այնպիսի ձեւի մէջ, որն արտառոց են համարել միջնադարեան հեղինակները, թէ՛ եւ պիտակել են սոսկ որպէս անպարկեշտ

⁵³ Д. ЖАНДО, *նշ. աշխ.*, էջ 17 (ընդգծումը մերն է - Գ. Օ.):

⁵⁴ Եփրեմ Ասորու այդ նկարագրութիւնը բերուած է Յովհաննիսեանի 2. «Թատրոնը միջնադարեան Հայաստանում» աշխատութիւնում (էջ 224):

ու անառակ վարքագիծ: «Կախալաց դուստրն Հերովդիայ ի մէջ քազմակամիւն. եւ հանոյ թուեցաւ Հերովդի», - գրում է Մատթէոս աւետարանիչը (Մատթ. ԺԴ, 6): Մարկոսի աւետարանում նոյնպէս գրուած է. «Եւ ի մտանել դստեր Հերովդիայ եւ ի կախալել, հանոյ եղել Հերովդի եւ քազմակամացն...» (Մարկ. 2, 21-22): Հանոյ բառը, որն այս համատեքստում, անշուշտ, նշանակում է ցանկալի⁵⁵, ուրիշ ենթադրութեան, կարծես, չի էլ մղում. պարի մէջ Հերովդիադայի դուստրը այնպէս է ներկայացել իր կանացի բարեմասնութիւններով, որ հասկանալի է դառնում, թէ ինչու «եռաց եւ շարժեցաւ սակաւ սակաւ շնութեան ցանկութիւն ի սիրտս» ներկաների, ինչպէս կ'ասէր Այգեկեցին: Սակայն սա էլ, դեռեւս արտառոց կարող էր չհամարուել, եթէ այդ պարի մէջ մեկնիչները չտեսնէին ամենակարեւորը՝ Հերովդիադայի դստեր կենտրոնագանց գործողութեան արդիւնքը, որ զրոյում է Հերովդէսին ողբերգական քայլի՝ զոհարելու Յովհաննէս Մկրտչի գլուխը: Այս հանգամանքը եւ՛ Ոսկերբանին, եւ՛ Սիմէոն Աղճնեաց եպիսկոպոսին, եւ՛ Եփրեմ Ասորուն, եւ՛ միջնադարեան այն հեղինակներին, որոնց ստեղծագործութիւններում՝ գրական, թէ՛ զարդասպտիկերային, նկարագրում է այս աւետարանական դրուագը, թէլադրել է դիմելու տուեալ ժամանակաշրջանում տարածուած նմանօրինակ խաղային օրինակների, ասել է, թէ՛ թատերային պարի եւ կենտրոնագանց խաղի հակադրութեանը, ինչն էլ յատուկ է կրկէսային արուեստի բոլոր պայմանաձեւերին: Կիսամերկ պարուհու հեշտասէր կեցուածքներն ու շարժուձեւերն իրենց զարգանկարային մեղեդայնութեամբ («ձովածփելիւն իւր մահաբեր աջօքն», «հիւսէր գելեւելլըս ընդ միմեանս», «կայթել կախալէր թմրկահարիկ աղջիկն») դեռեւս հիմնականում անմիջական խաղի գրսեւորումներ են, թէ՛ եւ Ֆիդիկականի բացայայտ ընդգծելու ձեւերն արդէն իսկ ենթադրում են խաղի կառուցուածքային երկուութիւն՝ անմիջական եւ միջնորդաւորուած, երբ անձը, օտարանալով իրենից, միաժամանակ դիտում է իրեն իբրեւ առարկայ: Սակայն ըստ էութեան այս ամէնն արւում է միտումնաւոր՝ առաւելագոյնս ընդգծելու համար անսպասելիութեան պահը, երբ կտրուկ կը փոխուի խաղի ուժը եւ կենտրոնագանց գործողութիւնից առաջ կը ստեղծուի յուզական լարում: Այս պահին անմիջապէս յաջորդում է հնարքը՝ լարախաղային կամ էլ ձեռնածուական,

55

Հմմտ. Նոր քաղգիրք հայկագնան լեզուի, նշ. հրատ., էջ 10:

որն էլ հենց գարմանքի հետ առաջ է քերում նաև գեղագիտական ազդեցութիւն:

Եւ վերջապէս երրորդ, ոչ պակաս կարեւոր առանձնայատկութիւնը երաժշտական յորինուածքն է, որն այստեղ ոչ թէ սոսկ հնչիւնային հեռապատկեր է ապահովում՝ խաղը հանդիսականին առաւել հաճոյ դարձնելու համար, այլ ամէնից առաջ կազմակերպում է այդ խաղն իբրև մի շարք կենտրոնագանց արարքների գեղարուեստական ամբողջութիւն: Ըստ հուլիանի, գործողութիւնն ու նուազն այստեղ այնքան սերտ են միահիւսուած, որ դժուար է ասել, թէ իրականում ո՞րն էր առաջնահերթ. գործողութիւնն է կառուցուել նուազին համապատասխան, թէ՞ հակառակը: Սա, ի հարկէ, գալիս է այս կարգի խաղերի համադրական բնոյթից, որն իր արտայայտումն է գտել նաև սոյն եւ շէր կոչուած աշխարհիկ երգարուեստի ժանրերում⁵⁶: Հաւանաբար, հէնց դա էլ նկատի է ունեցել Ղեւոնդ Ալիշանը, երբ գրել է. «Այսպիսի երգեր, գործիքն հիմնապէս եղանակով եւ նուագարաններով կ'երգէին, մեր հիմնական ուսմկաց խաղ ըստածներուն կը նմանէին, գործիքն ցուց կամ շէր կ'անուանէին»⁵⁷:

Ինչպէս արդէն նշել ենք, դեռևս Այգեկցին է նկատել, որ այս կարգի խաղերի ժամանակ լարային գործիքների կողքին պարտադիր պէտք է լինէին նաև փողային կամ էլ հարուածային գործիքներ (փող եւ ջնար, ծնծղայ եւ տասնադի, թմբուկ եւ քնար), որոնք հակադիր (contraste) շեշտադրումներ էին մտցնում երաժշտութեան մէջ: Սա յատուկ է եղել նաև երգիծական բրնոյթի այն վաղնջական երգերին, որոնց մասին յիշատակում է Ալիշանը, եւ որոնց հէնքի վրայ էլ, հաւանաբար, կառուցուել են այդ խաղերն իրենց արտասովոր նկարագրով: Պատահական չէ, որ միջնադարեան մանրանկարներում յաճախ կարելի է տեսնել, թէ ինչպէս խաղացողներն իրենք են միաժամանակ նուագում վերոնշեալ գործիքները⁵⁸: Սա ենթադրել է տալիս, որ ներկայաց-

56 Այս երգիծական բնոյթի երգերի մեկնութեան վերաբերեալ մանրամասն տե՛ս Յովհ. Է. ՆՆԻՍԵԱՆ Է. Թատրոնը միջնադարեան Հայաստանում, էջ 91-93, 97-105. Նաև տե՛ս Н. ТАГМИЗЯН, Музыка в древней и средневековой Армении, Ереван, изд. «Светакан грох», 1982, с. 9.

57 Ղ. Ա. ԻՇԱՆ, Յուշիկի հայրենաց հայոց, Վ. Բ., Վենետիկ, 1921, էջ 109:

58 Դրանց հիմնական մասը ներկայացուած է է. Պետրոսեանի «Թատրական գծերը միջնադարեան մանրանկարներում» աշխատութիւնում. «Հայ ազգ-

ման մէջ նրանք կարող էին ոչ միայն հանդէս գալ իբրեւ վարժ լարախաղացողներ կամ ձեռնածուներ, այլ նաեւ իբրեւ հմուտ երաժիշտներ: Ահա թատերային եւս խաղի մի տարատեսակ, որն ուղղակի բխում է կրկէսային արուեստի ձեւաբանական առանձնայատկութիւններից եւ մինչեւ օրս էլ չի կորցրել իր կիրառական նշանակութիւնը երաժշտական կենտրոնագանց տեսակարարումով:

ԳՐԻԳՈՐ ՕՐԴՈՅԵԱՆ

գրութիւն եւ բանահիւտութիւն», 7, Երեւան, 1975, աղիւսակներ՝ Նաեւ տե՛ս
В. П. ДАРКЕВИЧ, նշ. աշխ., էջ 12-15:

Morphological Peculiarities of Acrobatic Dancing and Circus Pantomime

GRIGOR ORDOYAN

(summary)

Every circus act is an action of extraordinary physical deeds, which can have a decorative and picturesque and a non-picturesque basis.

These two styles are part of the art of dance and choreography. The first by means of expression is closer to the theatrical arts and when picturesque elements are included the dance often turns to pantomime.

On the contrary, in pure dancing each movement is conformed with the musical timber, melody and tempo.

In these two cases, conditional forms peculiar to the circus cohabit with the art of dancing and in another case with theatre.

Dancing acrobatics and circus pantomime are comparable with the above mentioned arts, but the expression of man, the wild and objective world comes into play.

Numerous plays with a manifestation in the circus have remained unchanged until today. Dancing, and pantomime containing acrobatics and tricks are often executed with great flair.

These tricks are indifferent forms. For example, plays often involve not only people, but objects, animals, and musical instruments. This is especially true in the middle ages when sorcery and witchcraft were accepted by the viewer.